

Менің елім – Мәңгілік ел



Биылғы жыл Қазақстан үшін айтулы шаралармен, жетістіктермен ерекшеленуде. Елбасымыз Н.Ә. Назарбаевтың «Қазақстанның үшінші жаңғыруы: жаһандық бәсекеге қабілеттілік» жолдауы мен «Болашаққа бағдар: рухани жаңғыру» атты бағдарламалық мақаласынан басталған сәтті жыл Қазақстанды толағай табыстарға бастауда. Осы орайда еліміздегі басты оқиғаларды талқылап, үн қосу мақсатымен № 4 студенттер үйінде доцент Ә.Т. Мылқайдаровтың ұйымдастыруымен география, жерге орналастыру және кадастр кафедрасының 1-курс студенттеріне арналған «Еліммен мен мақтанам» атты тәрбиелік шара өтті.

Жолдауда білім мен ғылымға баса көңіл бөлінген, яғни сананы жаңғырта отырып, биік белестерді бағындыру тұр. Бұл жастарды бәсекеге қабілетті етіп, әлемдік деңгейдегі жетістіктерге жетуге, елімізді көркейтуге үлес қосуға жетелейтіні белгілі. Осындай рухани жаңғыруда білімнің тұрпаты да өзгерді. Бәсекелестік заманында әл-Фараби атындағы

ҚазҰУ көшбасшылық орнын сақтап, заман талабына сай алға қадам басып келеді. Биыл грант саны бойынша төрт мыңнан астам студенттің ҚазҰУ-ды таңдауы сөзімізге дәлел. Шарада студенттер қоғамда талқыланып жатқан мәселелермен қатар, оқу орнының жобаларымен және жетістіктерімен жан-жақты танысты. Студенттер еліміздегі көшбасшы

университеттің студенті атанғандарын мақтан тұтатынын айта келіп, еліміздің осы жылдың өзінде бірқатар жетістіктерге қол жеткізгеніне тоқталды.

Бірінші кезекте, Қазақстанның жер жаһанда бейбітшілікті насихаттап, бейбітшілік үшін «Сирия» мәселесіне арағайындық болуы – еліміздің әлемдегі соғыс атаулыға қарсы екенін, жер жаһанда тыныштық болып, балалардың, жастардың алаңсыз білім мен тәрбие алуы керектігін көрсетті.

Екінші кезекте, бүкіләлемдік «ЭКСПО – 2017» көрмесін абыроймен өткізуі – Қазақстанды дүниежүзіне танытты және әлемдегі беделінің артуына ықпал етті. Көрмеге әлемнің көптеген елдерінен туристер мен еріктілер келіп, Қазақстанды танып білуі танымалдылығымызды арттырды.

Үшінші кезекте, еліміздің білім мен ғылымда, мәдениетте, спортта, экономикада жеткен толағай табыстары ұшан-теңіз екені айтылып, студенттердің мақтанышын оятты.

Осындай қазақ елімен жастардың мақтанатыны, мақтана отырып отансүйгіш сезімі артатыны белгілі. Елбасымыздың «табысты болудың ең іргелі, басты факторы білім екенін әркім терең түсінуі керек. Жастарымыз басымдық беретін межелердің қатарында білім әрдайым бірінші орында тұруы шарт. Себебі, құндылықтар жүйесінде білімді бәрінен биік қоятын ұлт қана табысқа жетеді» деген сөздері жастарға жігер беріп, жарқын болашаққа деген зор сенім сыйлады.

Ә.Т. МЫЛҚАЙДАРОВ,
география, жерге орналастыру және кадастр кафедрасының доценті

Қазақ тілі – БАЙЛЫҒЫМ



Қазақ тілі – әлемдегі аса бай тілдердің бірі. Бірақ бүгінгі жаһандану дәуірінде қай ұлттың болса да сөзі шұбарланып, бұзылуда. «Бұл мәселе кеңестік кезеңде отарлық құрсауда болған қазақ тіліне де қатысты. Сондықтан әр казактың бөгде сөзді араластырмай, ана тілінде таза сөйлей білуі аса маңызды», – дейді шара ұйымдастырушылары. Жастар туған тілге құрметпен қарауға, қазақ тілінің қолданылу аясын кеңейту арқылы мәртебесін көтеруге шақырды. Туған тілді дәріптеген шара кафедраның белді ұстаздары, профессорлар – К.У .Биекеновтің, Г.С. Әбдірайымованың, М.С. Садырованың және З.Ж. Жаназарованың қатысуымен жүргізілді.

Жастар ана тіліміздің бүгінгі таңның ел сүйер қауымы үшін қаншалықты маңызды орын алатындығымен қатар, ана тілге деген құрметті асқактатуды мақсат етті. Сондай-ақ тәуелсіздігі тұғырлы мемлекетіміздің аясында өмір сүріп отырған басқа да этнос өкілдеріне құрмет көрсетудің қаншалықты маңызды екендігіне де көңіл бөлінді. Тілдер апталығы аясында өтіп жатқан шаралар студенттердің бойындағы елге, тілге деген патриоттық сезімнің артуына септігін тигізері сөзсіз.

Қасиетті тілімізді кастерлеп, оның маңызының қаншалықты құнды екенін жүрекпен ұғына білу – баршамыздың перзенттік борышымыз деп қабылдаймын. Өз тілінің қадірін біліп, оған жан-тәнімен жаны ашитын азаматтарымыздың тілге деген құрметтік сезімдері оянғанда ғана қасиетті тіліміздің мәртебесі асқақтай бермек.

А.М. СҰЛТАНОВА,
әлеуметтану және әлеуметтік жұмыс кафедрасының аға оқытушысы

ЖАСТАР ТІЛ МЕРЕКЕСІН ЕРЕКШЕ АТАП ӨТТІ

ҚазҰУ-да «Сұңқар» студенттер мен магистранттар кәсіподағының ұйымдастыруымен 22 қыркүйек– Тілдер мерекесіне арналған «Бауырсақ party» шарасы өтті.



Кәсіподақ төрайымы Шұғыла Бүрлібаева: «Негізгі мақсат – атамыздың қанымен дарып, анамыздың ақ сүтімен бойымызға дарыған ана тілімізді қолдау, қорғау, күні кеше ұстағанның қолында, тістегеннің аузында кете жаздаған ұлттық құндылықтарымызды түгендеп, жастар арасында дастарханымызға тиесілі дәм дайындауды жаңғырту, халыққа кеңінен дәріптеу», – деп атап өтті.

Мерекелік шарада студенттер мен ұстаздар қауымына бауырсақтар таратылды. Осы мерекеге орай 160 кг бауырсақ әкелінді. Бауырсақтан дәм тату үшін алдымен бір мақал-мәтел немесе қара өлең айту керектігі науқанға ерекше мән үстеді. Студенттер ішінде өзінің білімдарлығымен көзге түсіп, мақал-мәтел айтуда және қара өлең оқуда оқ бойы озып шыққандары да жоқ емес. Шара университет кампусын толық қамтыды. «Мәңгілік ел» студенттер мен түлектер қақпасынан бастап, ректорат ғимаратының және барлық факультеттердің оқу корпустарының алдында бауырсақтар таратылды.

Сондай-ақ университеттің өнерлі жастары шағын мерекелік концерт беріп, шараның шырайын кіргізді. «Сұңқар» студенттер мен магистранттар кәсіподағының мүшелері белсенділік танытты. Ана тілімізді насихаттап, қазақылықты паш етуде барша факультет студенттері алдарына жан салмады. Қаракөз қыздарымыз ұлттық нақышта киім киіп, мерекенің сәнін келтірсе, шанағына күй тұнған домбыра ұлттық өнерімізбен сусындатып, сұлу саздың сиқырын сездірді.

Айта кетерлігі, бұл – «Сұңқар» студенттер мен магистранттар кәсіподағының Тілдер мерекесіне орай жыл сайын дәстүрлі түрде ұйымдастыратын ауқымды шараларының бірі. Шарада университетіміздің 15 факультеті бой көрсетті. Сол арқылы студенттер тіл мерекесіне салғырт қарамайтындығын және ана тілімізге деген зор құрметтерін білдірді.

Досжан БАЛАБЕКҰЛЫ,
философия және саясаттану факультетінің 1-курс PhD докторанты

ҚҰРЫЛТАЙШЫ:

Әл-Фараби атындағы Қазақ ұлттық университетінің ректораты

РЕДАКЦИЯ АЛҚАСЫ:

Бас редактор.: **Әйгерім ӘЛІМБЕКОВА**
Тілшілер: **Жазерке ҚАРАТАЕВА, Ақмарал АЛИЕВА**
Дизайнер – **Досжан БАЛАБЕКҰЛЫ**
Фототілші –**Марат ЖҮНІСБЕКОВ**
Корректорлар: **Гүлмира БЕКБЕРДИЕВА, Қарлыға ИБРАГИМОВА**

МЕКЕНЖАЙЫ:

050040, Алматы қ., әл-Фараби даңғылы, 71, ректорат, 11-қабат, №1104 бөлме.
Байланыс телефоны: 377-33-30, ішкі: 11-94, тікелей: 377-31-48.

Электронды мекенжай: **kazuniver2016gazeta@gmail.com**

Газет редакцияның компьютер орталығында тіріліп, беттелді. "Дәуір" ЖШС РПБК-де басылды. Алматы қаласы, Қалдаяқов көшесі,17

Тел.: 8(727) 273-12-04

Бағасы келісім бойынша. Таралымы 1000 дана Тапсырыс: №3024

- Жарияланған мақаладағы автор пікірі редакцияның көзқарасын білдірмейді.
- Редакцияға түскен қолжазба қайтарылмайды, үш компьютерлік беттен асатын материалдар қабылданбайды.
- «Қазақ университетіне» жарияланған мақала көшіріліп басылса, сілтеме жасалуы міндетті.
- Жарнама мәтініне жарнама беруші жауапты.